



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCLXXXI. ad annum MCCCXIV.

Parisiis, 1644

Epistola X. Gregorii Papae IX. Ad Archiepiscopvm Bremensem, &c. De
monasterio sanctae Mariae in Stadio.

urn:nbn:de:hbz:466:1-15974

traditam a Domino præcauere. Ad hæc, vt super præmissis omnibus officium sibi commissum liberius possint & efficacius exercere, omnibus qui ad prædicationem eorum accesserint in singulis stationibus viginti dies, illis vero qui ad impugnandum hæreticos, fautores, receptatores & defensores eorum in munitioibus & castellis, vel alias contra ecclesiam rebellantes, ipsis ex animo auxilium, consilium præstiterint, vel fauorem, de omnipotentis Dei misericordia & beatorum Petri & Pauli apostolorum eius auctoritate confisi, tres annos de iniuncta sibi pœnitentia relaxamus. Et si qui ex his in prosecutione huiusmodi negotii forte decesserint, eis omnium peccatorum, de quibus corde contriti ac ore confessi sunt, plenam veniam indulgemus. Ne vero aliquid fratribus ipsis desit ad prædictum negotium prosequendum, in contradictores & rebelles ecclesiasticam proferendi censuram tenore præsentium liberam eis concedimus facultatem. Prædicatores quoque quæstuarios, quorum interest caritatiua tantum subsidia simpliciter petere, ac indulgentiam, si quam forsan habent, exponere, a prædicationis officio, quod ad ipsos nullatenus pertinet, compescendi censura simili, eisdem nihilo minus licentiam indulgemus.

Datum Viterbii decimotertio Kalendas Iunii, pontificatus nostri anno vndecimo.

EPISTOLA X.

GREGORII PAPÆ IX.

AD ARCHIEPISCOPVM BREMENSEM, &c.

De monasterio sanctæ Mariæ in Stadio.

Gregorius episcopus seruus seruorum Dei venerabili fratri Bremensi archiepiscopo, & dilectis filiis decano & Ioanni Bersak, canonicis Bremensibus, salutem & apostolicam benedictionem.

DESIDERIA deuotorum, in quibus fructus æternæ vitæ contineri dignoscitur, eo promptioribus ad effectum per nos sunt deducenda studiis, quo super talibus exequendis nobis inesse debet diligentia specialis. Hinc

est quod cum monasterium sanctæ Mariæ in Stadio ordinis sancti Benedicti, Bremensis diœcesis, sicut accepimus, sit peccatis exigentibus ita dispositum, quod euidenter ibidem non absque diuini numinis offensa salus negligitur animarum, ad preces abbatis eiusdem monasterii super hoc salubriter prouidere volentes, discretioni vestræ, per apostolica scripta mandamus, quatenus ipsum, si salubriter in suo non possit ordine reformari, de Cisterciensi ordine consilium habendo præ oculis reformare curetis, illos ex iisdem monachis, qui forte meliorationis huiusmodi gratiam consequi recusantes noluerint habitum Cisterciensem assumere, in aliis locis sui ordinis collocando, contradictores per censuram ecclesiasticam, appellatione postposita, compescatis. Quod si non omnes his exequendis interesse poteritis, tu, frater archiepiscope, cum altero eorum nihilo minus exequaris.

Datum Viterbii secundo Nonas Maii, pontificatus nostri anno vndecimo.

EPISTOLA XI.

GREGORII PAPÆ IX.

AD OTTONEM CARDINALEM LEGATVM
IN ANGLIA.

Fridericum secundum imperatorem excommunicat, & excommunicationem publicari iubet.

Gregorius episcopus seruus seruorum Dei dilecto filio suo Ottoni sancti Nicolai in carcere Tulliano diacono cardinali, apostolicæ sedis legato, salutem & apostolicam benedictionem.

SEDES apostolica, sicut totus fere orbis facti euidentia didicit, Fridericum dictum imperatorem, ex quo ipsum ex utero matris excepit genibus, affectu materno prosequens, lactauit vberibus, & humeris baiulauit; quem olim omni pene destitutum auxilio, & dubiis tantum derelictum euentibus, suo recepit patrocinio confouendum; opponens se potenter inuasoribus regni sui, qui in terram eius oculos auiditatis iniecerant. Cuius iam fines ingressi, eam absque vlllo defensionis obstaculo vsurpabant; & defendens eundem ab insidiantibus vitæ suæ, qui